

陳節母姚太君傳

光緒甲辰禮闈爲有清三百年科目終局入彀者多儁才吾湘陳杏驄農部繼訓允溫雅有度與予京邸過從甚歡自予出都門別杏驄二十五年矣今年杏驄數以書抵予述其祖母姚太君節行甚具予爲肅然歎嗟久之太君故長沙右族年十五歸同邑陳東有先生時舅和鳴翁姑謝甘皆在堂太君承事左右謹踐婦職咸能曲得其歡和鳴翁卞急不時訶怒太君婉孌將順輒爲色霽家無婢嫗饋饘績紉澣洗諸務太君悉躬任不言勞常質明起夜分乃息悉性慈淑娣姒間終歲無諍語遇窮乏者

無戚疏周之曰吾甯損己以濟人也內外宗交稱其賢會東有先生患噎困甚姑謝亦病篤太君調護周至不解帶者數月東有先生竟不起太君號痛幾絕時年餘二十親串或微諷改適截髮自誓矢志不二撫從子煖卿君承祀母子相依於屢空之中曲黷隱愍楮柱門戶煖卿君先後生五子長卽杏聰太君尤珍愛之提抱拊畜自忘其憊杏聰甫冠喪母弟妹幼稚靡依悉賴太君鞠之初煖卿君以貧出佐戎幕從左文襄公間關閩隴恆屢歲不歸杏聰幾輟學太君排衆議力遣從名師竟其業及杏聰奮迹京僚獲祿養之資太君以覃恩得膺二品封兼荷旌

表如例而服食儉穀一如昔窮約時煖卿君以狐裘進屏不御
曰先人未嘗衣此非所安也其不以亨屯改度如此夫女子不
幸失所天矚然守志殫極艱苦不恤但行其心之所安激於義
之不可渝而已何嘗計他日報施有所覬望於其間哉然予觀
貞節之後熾昌者爲多以此見天未嘗不褒許而護佑之而近
世邪說決男女之大防必非天所與可知已方望溪氏紀宛平
高節婦僦珠市西板屋縫紉爲生孫裔發憤成進士爲朝官其
第宅適當昔所僦板屋處節婦時指示子孫姻黨京師之人亦
以爲美談太君之處困雖不至如高而杏驄文行俱美發聞於

時識者咸謂柏舟之報宜然誰謂天道不足徵耶

清翰林院編修掌江蘇道監察御史四川提學使湘潭趙啓霖
拜撰